

# Denn lohnt sük'n Emmer Farv woll

IN D' LUUR

**Karin Böhmer**

redaktion@on-online.de



Is, as wenn de Düvel in d' Papieren sitt. Erst weren d'r kien Schölers, de in de Klassenrumen van de oll IGS-Boo in Au-erk sitten wullen. Un nu, wo dat Boowark an en Bundesamt verhüürt is, sitten de Mitarbeiters in't Homeoffice un bruken hör Kontor ok eerstmaal nich. Man dat is nettglik, Hauptsak, dat geiht wieder. De Landkreis, de dat Huus hören deit, weer slau as'n Ülck. För Schölers weren de Klassen nich mehr good genoeg. Man Renoveren köst Geld. Un Ofrieten ok. Daar is dat fein, wenn sük en solventen Hüürder finnt. Denn lohnt sük'n Emmer Farv. Un wat beters as de Bund is as Hüürsmann nich to kriegen. Dat Land haut mit sien Flüchtlinge un sien Impf-Kraam tuskendör to faken of. Dat weet de Kreis. Un so hett'n ollen Bratz noch Nütt.